

Служба обща
новомученице Российстей 20-го века единой

Вечер

На Господи, воззвах: стихиры, глас 4.

Подобен: Яко добля:

Яко древле Мариам пророчица,/ сквозе Чермное море прошедши,/ с лики и тимпаны/ Бога прославляше,/ ныне страданица (имярек) славная,/ пучину безбожных гонений преплывши/ и землю Русскую кровью украсивши,/ Господу победную песнь воспевае:/ славно бо прославися.

Яко пророчица Анна бесплодная,/ моляшеся о даровании чада/ и бысть Богом услышана,/ тако твое воздыхание,/ мученице (имярек) богоблаженная,/ Небес достигло есть,/ и дарова Господь Церкви Русстей сыны и дочери,/ иже посреде гонений Христа исповедаша:/ славно бо прославися.

Яко сарептская вдовица,/ во дни отступления Израиля/ пророка Божия Илию небоязненно прият,/ тако и ты, мученице (имярек),/ в годину гонений лютых на Церковь Русскую/ страждущим людем послужи/ и гладныя напита,/ не убоявшись прещений лукавых./ Темже ты ныне достойно почитаем.

Яко древле Соломония/ во утверждение веры во Израили/ чада своя на смерть мученическую благослови,/ послежде и себе на страдания предаде,/ тако и ты, мученице (имярек),/ верныя люди во дни безбожия/ в вере и терпении укрепляющи,/ смерть за Христа прияла еси./ Темже ты величаем.

Слава, глас 8:

Срадуются с нами мученичестии лица,/ девы, матери и преподобныя жены,/ се бо врата Царствия Небеснаго отверзаются/ и мученица (имярек) к престолу Божию восходит,/ прославляющи Отца, и Сына, и Святаго Духа,/ Троицу Единосущную и Нераздельную.

И ныне, Богородичен: Царь Небесный:

Вход. Прокимен дне. И чтения три мученическая.

Пророчества Исаина чтение (глава 43):

Так о глаголет Господь:/ вси языцы собращася вкупе, и соберутся князи от них./ Кто возвестит сия в них?/ Или, яже от начала, кто слышана сотворит вам?/ Да приведут свидетели своя, и оправдятся,/ и да услышат, и да рекут истину./ Будите Ми свидетели,/ и аз свидетель, глаголет Господь Бог,/ и отрок, егоже избрах./ Да познаете и веруете Ми/ и разумеете, яко аз есмь,/ прежде Мене не бысть ин Бог, и по Мне не будет./ аз есмь Бог,/ и несть, разве Мене, спасаяй./ аз возвестих и спасох,/ уничижих и не бе в вас чуждий./ Вы Мне свидетели, и аз Господь Бог,/ и ещё от начала аз есмь,/ и несть от рук Моих избавляяй./ Сотворю, и кто отвратит то?/ Сице глаголет Господь Бог,/ избавляяй вас Святыи Израилев.

Премудрости Соломоновы чтение (глава 3):

Праведных души в руке Божией, и не прикоснется их мука./ Непщевани быша во очесех безумных умрети,/ и вменися озлобление исход их./ И еже от нас шествие — сокрушение,/ они же суть в мире. / Ибо пред лицом

человеческим, аще и муку примут,/ упование их безсмертия исполнено./ И в мале наказани бывше, великими благодетельствовани будут,/ яко Бог искуси я и обрете их достойны Себе./ Яко злато в горниле, искуси их/ и, яко всеплодие жертвенное, прият я. / И во время посещения их возсияют/ и, яко искры по стеблию, потекут./ Судят языком и обладают людьми,/ и воцарится Господь в них во веки. / Надеющиеся Нань разумеют истину/ и вернии в любви пребудут Ему,/ яко благодать и милость в преподобных Его/ и посещение во избранных Его.

Премудрости Соломоновы чтение (главы 5 и 6):

Праведницы во веки живут, и в Господе мзда их, и попечение их у Вышняго./ Сего ради примут Царствие благолепия, и венец доброты от руки Господни./ зане десницею покрывает я, и мышцею защитит их./ Приимет всеоружие рвение свое, и вооружит тварь в месть врагом./ Облечется в броня правды, и возложит шлем, суд нелицемерен./ Приимет щит непобедимый, преподобие./ Поострит же напрасный гнев во оружие;/ споборет же с ним мир на безумныя./ Пойдут праволучныя стрелы молниины,/ и яко от благокругла лука облаков, на намерение полетят./ И от каменометныя ярости исполнь падут грады,/ вознегодует на них вода морская, реки же потопят я нагло./ Сопротив станет им Дух Силы, и яко вихор развеет их,/ и опустошит всю землю беззаконие, и злодейство превратит престолы сильных./ Слышите убо, царие, и разумеите, навькните, судии концев земли./ Внушите, держащи множества, и гордящиися о народах языков,/ яко дана есть от Господа держава вам, и сила от Вышняго.

На стиховне стихиры, глас 2.

Подобен: Егда от Древа:

Егда на Церковь Русскую/ восташа безбожнии людие,/ тогда веры православныя не отступила еси/ и, якоже древле мироносицы,/ мужемудренная (*имярек*),/ не убоявшися страха и прещения,/ Христу последовала еси/ и верность Ему соблюла еси./ Сего ради ныне в селениих райских ликуеши.

Стих: Зане Тебе ради умерщвляемся весь день,/ вменихомся, яко овцы заколения.

Егда сродницы наши от Бога отступиша/ и святыя заповеди Его попраша,/ тогда гнев праведный прииде на землю нашу,/ ты же, мученице (*имярек*),/ со слезами Христу вопияла еси:/ прости, Господи, неразумныя и ожесточенныя сердцем,/ аз же на раны за Тя готова есмь,/ приими мя, яко жертву, пожершуюся Тебе./ Сего ради ныне в Небесных обителях прославляешися.

Стих: Дивен Бог во святых Своих,/ Бог Израилев.

Егда безбожнии людие/ восташа на Господа и на рабы Его,/ тогда Церковь Русская,/ кровию мученическою, яко багряницею, украсися,/ ты же, всехвальная (*имярек*),/ благочестием и любовию утверждаема,/ страданий за Христа не убояся/ и смертью твоею воскресение Его проповеда./ Сего ради в лице новомучеников Российских прославляешися.

Слава, глас 5:

Веру, надежду и любовь стяжавши,/ мученице (*имярек*),/ премудрая

ученица Христова явилася еси/ и в годину гонений на Церковь Русскую/ смерть мученическую восприяла еси./ Сего ради ныне во Царствии Божии ликуеши/ и учиши нас тремя добродетельми/ прославляти Троидинаго Бога.

И ныне, Богородичен: Храм и Дверь еси:

Тропарь, глас 4:

Благочестно в законе Господни поживши,/ веру Православную сохранила еси/ и, терпением гонители Церкви Русския посрамивши,/ смерть за Христа прияла еси,/ мученице славная (*имярек*),/ престолу Божию предстоящи,/ моли спастися душам нашим.

На утрени

По 1-м стихословии седален, глас 7:

Суету мирскую презревши,/ украсилася еси нетлением кроткого и молчаливаго духа/ и явила еси веру несумненную, упование непосредственное,/ любовь истинную, чистый страх Господень,/ память смертную и о Страшном Суде помышление./ Темже в годину гонений на Церковь Русскую не поколебася душа твоя,/ мученице Христова (*имярек*).

Слава, и ныне, Богородичен:

Стена и Покров еси, Владычице,/ и тихое Пристанище всем, в бедах сущым,/ к Твоему заступлению верою притекающим./ Темже и мы усердно вопием Ти:/ соблюди Церковь Русскую в Православии и единомыслии, Дево Пречистая.

По 2-м стихословии седален, глас 4:

Богатство мира сего презревши,/ спасения усердно взыскала еси/ и Христа, яко бисер многоценный,/ во страданиях твоих обрела еси, мученице достохвальная./ Сего ради ныне Церковь Русская созывает верных на торжество/ прославити дочь свою мученицу (*имярек*) славную.

Слава, и ныне, Богородичен:

Веры непоколебимое Утверждение/ и Упование непостыдное душ наших,/ Тя, Богородице, песнями величаем:/ радуйся, Православия Ограждение,/ радуйся, земли Русския Покрове,/ радуйся, Невесто Невестная.

Величание:

Величаем тя,/ святая [ново]мученице (*имярек*),/ и чтим честная страдания твоя,/ яже за Христа/ претерпела еси.

Псалом избранный.

Бог нам Прибежище и Сила, Помощник в скорбех, обретших ны зело.

Приведутся Царю девы в веселии и радовании.

Исповемся Тебе в людех, Господи, пою Тебе во языцех.

Мене ждаша грешницы погубити мя, свидения Твоя разумех.

Глаголах о свидениях Твоих пред цари, и не стыдяхся.

Обыдоша мя пси мнози, сонм лукавых одержаша мя.

Обыдоша мя, яко пчелы сот, и разгорешася, яко огонь в тернии.

Искусил ны еси, Боже, разжегл ны еси, якоже разжизается серебро.

Аз на раны готов, и бых язвен весь день.

Тебе ради умерщвляемся, вменихомся, яко овцы заколения.

По полиелеи седален, глас 8:

Богозванная мученице (*имярек*),/ страха мучения не убоявшись,/ к

подвигу за Христа мужественно устремилася еси/ и душу твою, яко жертву, Жениху возлюбленному в страданиях предающи,/ за мучителей, по заповеди Его, усердно молилася еси:/ прости им, Господи,/ не ведят бо, что творят.

Слава, и ныне, Богородичен:

Яко Деву и Едину в женах, / Тя безсеменно рождшую Бога плотию, / вси ублажаем, роди человечести: / Огнь бо вселися в Тя Божества,/ и, яко Младенца, питаеши Зиждителя и Господа./ Тем, Ангельский собор и человеческий род,/ достойно славим Пресвятое Рождество Твое/ и согласно вопием Ти:/ моли Христа Бога прегрешений оставление даровати/ достойно поющим славу Твою.

Степенна, 1-й антифон 4-го гласа. Прокимен, глас 4: Дивен Бог во святых Своих,/ Бог Израилев. **Стих:** В церквах благословите Бога Господа от источник Израилевых. **Всякое дыхание: Евангелие от Матфея, зачало 104.**

По 50-м псалме стихира, глас 6:

Яко мудрая дева,/ светильник души твоя елеем добродетелей украсивши,/ в сретение Жениху твоему, *(имярек)* славная,/ радостне изшла еси/ и брачнаго чертога достигла еси,/ воспевающи с мудрыми девами:/ слава, Господи, неизреченному милосердию Твоему.

Канон, егоже краегранесие кроме Богородичнов: Жено, велия вера твоя спасе тя. **Глас 8.**

Песнь 1

Ирмос: Поим Господеви,/ проведшему люди Своя сквозе Чермное море,/ яко един славно прославися.

Жену доблю обретохом в земли нашей,/ праведным житием и страданиями Богу угодившую,/ юже по достоянию воспеваем.

Елеем благочестия сердце твое исполнивши, мученице *(имярек)*,/ бурю безбожия во отечестве нашем во дни гонений прешла еси,/ Христу Подвигоположнику славу возсылающи.

Не убоялася еси врагов Церкви Русския, мученице *(имярек)*,/ и о покаянии тех прилежно молилася еси,/ веру в Бога твердо исповедающи.

Богородичен: Богородицу Тя воистинну исповедуя,/ лик мучениц во след Тебе, Дево,/ со славою Христу приведесея.

Песнь 3

Ирмос: Ты еси Утверждение/ притекающих к Тебе, Господи,/ Ты еси Свет омраченных/ и поет Тя дух мой.

Оружием правды крепость диаволу низложила еси/ и Церкви Русския гонители безбожия победила еси,/ мученице Христова *(имярек)*.

Видяще тя ангелы на судищи беззаконнем, Христа исповедающе,/ укрепляху во страданиях/ и, яко доблюю мученицу, прославляху.

Егда нечестивии клеветаху и рекоша на тя всяк зол глагол,/ ты, мученице всехвальная, смирением Христовым вооружившись,/ блаженства евангельскаго исполнилася еси.

Богородичен: Богородице и Мати Света,/ лик святых новомучениц, Ты возлюбивый,/ воспеваеши в Царстве Сына Твоего,/ яко Честнейшую Херувим и славнейшую без сравнения Серафим.

Седален, глас 4:

Яко истинная дщи Церкви Христовы,/ Царю и Богу крестным путем последовала еси,/ Иже, благословив тя на страдания,/ крепость и дерзновение дарова,/ и венцем победным увенча, / мученице (имярек) доброславная.

Слава, и ныне, Богородичен:

Тя, Дево, яко Матерь Божию,/ лица мученичестии велегласно прославляют,/ темже, и мученица (имярек), во след Сына Твоего последовавши,/ согласно ублажает Тя, Пречистая.

Песнь 4

Ирмос: Услышах, Господи,/ смотрения Твоего таинство,/ разумех дела Твоя/ и прославих Твое Божество.

Любовию Христовую укрепляема, мученице (имярек),/ немощь естества женскаго превозмогла еси/ и мужественне на подвиги устремилася еси.

Исповедуючи Бога небоязненно,/ образ терпения верным показала еси/ и мучителей посрамила еси./ Темже ты вси, славная, величаем.

Яко ластовица доброгласная весну предваряет,/ тако и ты, мученице (имярек),/ возрождение Отечества и Церкви нашея/ посреде гонений верным людем возвестила еси,/ терпеливно мучения терпящи.

Богородичен: Яко добрую и красную в женах,/ ведут Тя, Дево, мученицы святыя/ и молятся о спасении душ наших.

Песнь 5

Ирмос: Утреннююще, вопием Ти,/ Господи, спаси ны,/ Ты бо еси Бог наш,/ разве Тебе иного не вемы.

Веры светильник не угасивши,/ ночь безбожия в земли нашей претекла еси/ и начальников тьмы посрамила еси, мученице прехвальная.

Елеем благочестия душу твою напитала еси богато, святая (имярек),/ и ныне пребываеши в сонме святых Церкви Русския.

Радовалася еси в темнице, яко в чертозе светлем,/ мученице (имярек) благославная, Христом просвещаема,/ Иже есть Свет миру, Живот и Воскресение.

Богородичен: Владычицу Деву, Христа неизреченно рождшую,/ христоролюбивыя жены радостно обстояща, непрестанно величают.

Песнь 6

Ирмос: Ризу мне подаждь светлу,/ одеяйся светом, яко ризою,/ Многомилостиве, Христе Боже наш.

Ангели святии удивляхуся,/ како чашу страданий, от руки Христовы приемши, мученице (имярек) честная,/ мужески испила еси.

Терпением смиренно укрепившись, / страданьми Христа ради нечестивыя победила еси, мученице славная,/ и Церковь Русскую возвеселила еси.

Возвесели Господь душу твою, мученице (имярек),/ и в ризу спасения облече,/ истканную от мученических кровей твоих.

Богородичен: Хвалу Богу принесем и Пречистую Богоматерь восхвалим,/ Юже ныне новомученицы и исповедницы с лики ангельскими/ достодолжно ублажают.

Кондак, глас 5:

Яко агница кроткая, / воспитанная на пажитех Церкви Русския, / страстотерпице Христова (*имярек*), / посреде лютых мучителей / тепле молилася еси: / Господи, прости им, / не ведят бо, что творят.

Икос:

Мученице (*имярек*) благославная, / заповеди Господни хранящи, / яко маслина плодovита, / в дому Церкви Русския явися / и, многоплодие добродетелей страданием вольным венчавши, / Ангелы возвесели, демоны же посрами. / Темже посреде лютых мучителей / тепле молилася еси: / Господи, прости им, / не ведят бо, что творят.

Песнь 7

Ирмос: От Иудеи дошедше отроцы, / в Вавилоне иногда, / верую Троицкою пламень пещный попраша, поюще: / отцев Боже, благословен еси.

Оболкшися в броню правды и шлем упования спасения восприемши, мученице достохвальная, / щитом веры православныя разжженныя стрелы лукаваго угасила еси.

Яко огнем Божественным, мученическими кровью твоими, мученице (*имярек*), / терния богохульная и плевелы неверия в земли нашей попалила еси.

Согрея сердце твое огнем Божественныя любви, / егда мучители ведоша тя на смерть, / юже мужественно претерпеваючи, / благодарение Богу возсылала еси, мученице славная.

Богородичен: Тя, благословенную в женах, Архангельским гласом величаем: / радуйся, Благодатная, Господь с Тобою.

Песнь 8

Ирмос: Царя Небеснаго, / Егоже поют вси ангельстии, / хвалите и превозносите во вся веки.

Пещь огненная не опали три отроки в Вавилоне иногда, / тако и тебе, мученице (*имярек*), / горнило испытаний не возможе поколебати, в терпении поющую: / превозносите Господа во веки.

Агница нескверная, мученица (*имярек*), / яко жертва непорочная в дар Богу принесеса. / Тоя молитвами, Долготерпеливе, / сподоби нас превозносити Тя во веки.

Страстей душевредных зной утоли молитвами твоими, мученице (*имярек*), / и сердца наша благоплодна содей, / да с тобою сподобимся прославляти Господа во веки.

Богородичен: Многопетая Дево, / страдальцев Радосте и жен святых Благолепие, / Тя поем, Милостивая, во веки.

Песнь 9

Ирмос: Тя, Неискусобрачную Матерь Бога Вышняго, / Тя паче ума рождшую словом воистинну Бога, / Вышшую Пречистых сил / немолчными славословении величаем.

Естество немощное силою Божиею укрепивши, / к совершенным подвигом устремилася еси / и мужемудренне венец мученический кровью твоими стяжала еси, (*имярек*) всечестная.

Ты, добропобедная мученице (*имярек*), Крест Христов, яко

всеоружие, восприемши,/ доблественне страдания претерпела еси/ и кознем дьявольским противостати возмогла еси./ Темже тя вси по достойанию величаем.

Яко мироносица, Христу последовала еси/ и страданием венц победный от Того прияла еси./ Темже, дерзновение велие имущи, / моли присно о почитающих тя.

Богородичен: Христовою любовью уязвляемая жены мученицы/ и от Бога венчавшаяся/ Тя, Всенепорочную и добрую в женах,/ почитают, яко Царицу Всечестную.

Светилен:

Мученица Твоя, Господи, *(имярек)*,/ яко мудрая дева, светильник души своя елеем украсивши,/ во след Тебе устремися,/ и, Чертога Небеснаго достигши,/ Света Невечернаго лицезрети сподобися./ Еяже молитвами, Светодавче, и нас светом Твоим озари/ и на путь истинный направи.

Слава, и ныне, Богородичен:

Всесвятая Богородице,/ святые жены имуща Тя, яко Сокровище Пребогатое,/ ликуют со Ангелы радостно/ и Бога Слова, из Тебе Рождшагося плотию за милосердие многое,/ славят непрестанно.

На хвалитех стихиры, глас 1.

Подобен: Небесных чинов:

Небесных чинов сопричастница/ и земли Русския крепкое предстательство,/ мученица Христова *(имярек)*/ ликует ныне в сонме новомучеников,/ воздаяние вечное приемши,/ и молится о душах наших.

Небеснаго Иерусалима избранница/ и Церкви Русския доброе украшение,/ кроткая стратотерпица *(имярек)*/ прославляет Бога во веки,/ хвалу Тому присно возсылаючи,/ и молится о душах наших.

Небесная славы наследница/ и земли наша дивная похвала,/ многострадальная *(имярек)*,/ яко праведница и мученица,/ молит Человеколюбца Бога/ о спасении душ наших.

Слава, глас 6:

Мученице Христова *(имярек)*,/ непорочным житием и вольным страданием/ Богу угодивши,/ землю нашу во Православии утвердила еси/ и, яко солнце, просветившися/ во Царствии Отца Небеснаго,/ Церковь Русскую возвеселила еси./ Ныне же со дерзновением/ молишися о душах наших.

И ныне, Богородичен, глас тойже:

Возвеличим вси Пренепорочную,/ Матерь Бога нашего,/ Юже освяти Дух Святой,/ яко Предстательство наше и Спасение/ и Святые Руси Заступление./ К Нейже ныне прибегаем/ и молитву возсылаем:/ Пресвятая Богородице, спаси нас.

Славословие великое и отпуст.

На Литургии

Блаженна от канона, песни 3-я и 6-я. Прокимен, глас 6: Тебе ради умерщвляемся весь день,/ вменихомся яко овцы заколения. **Стих:** О Бозе похвалимся весь день и о имени Твоем исповемся во век. **Апостол к Коринфяном, зачало 181.** Аллилуиа, глас 1: Терпя потерпех Господа, и внят ми. **Стих:** И услыша молитву мою. **Евангелие от Марка, зачало 21.** **Причастен:** Веселитесь, праведнии, о Господе, и исповедайте память святыни Его.

Молитва

О, доблественная страстотерпице Христова (*имярек*), земли нашае доброе прозябение, Церкви Русския избранная дщи! Кто не удивится силе Божией, в немощи твоей совершившейся? Ты бо, мужески враги видимыя и невидимыя низложивши, заточения и многия муки Христа ради претерпела еси и Царствие Небесное наследовала еси. Темже ты, яко благую и верную рабу Господню, достойно почитающе, прилежно молим: моли о нас Всещедраго Бога, да дарует Церкви Российстей благостояние, Отечеству нашему мир, людем во благочестии преспеяние, в скорбех утешение, в обстояниях помощь и заступление, да благодатию Божиею и твоим теплым предстательством земное жительство пройдем и Царствия Небеснаго достигнем, идеже вкупе с тобою сподобимся прославляти дивнаго во святых Своих Бога нашего, Отца и Сына и Святаго Духа во веки веков. Аминь.